

**МЕСЯЦА МАЯ В 10-Й ДЕНЬ**  
**СВЯТАГО АПОСТОЛА СИМОНА ЗИЛОТА**  
**НА ВЕЧЕРНИ**

Поем **Б**лажен муж: 1-й антифон.

На **Г**осподи возвах: Стихиры на 8, праздника 3 и апостола 5, глас 4.

Подобен: Дал еси знамение:

**С**имон чудный, \* апостолов похвала, \* яко луча к блистающая, пройде концы, \* отгоня мрак многобожия \* спасительными своими и светолучными Божественными учении, \* и всех просвети Едино славити Божество в Трех Ипостасех, \* нераздельно и несекомо. [Дважды.]

**С**имон апостол, \* обтек концы, \* якоже коло, валяся, \* всю землю попали идолонеистовства \* и, благочестием просветив, \* светлы лучи возже верным благодати: \* вся бо просвети Едино славити Божество в Трех Ипостасех, \* нераздельно и несекомо. [Дважды.]

**С**имон апостол, \* всесветлый и пречудный, \* языков учитель, мрежа Божественная, \* из глубины погибельныя нас уловившая Богословием высоким, \* истинный проповедник, \* вся ко Христову познанию ныне мудре приведе \* и своя исправления предложь трапезу красну.

Слава, глас 2:

**Р**евности тезоименит нареклся еси, Симоне досточудне: \* ревнуя, поревновал еси Богу Вседержителю, \* и, Божественных тя чудес исполнь, показа, \* странну бо ревность имея, \* тезоименит ревности, блаженне, назвался еси \* и нраву звание согласно стяжал еси. \* Темже в вышних сын, с вышними лики вселяемь, \* молися, Боговидче, Слову, Христу Богу нашему, \* даровати нам велию милость.

И ныне, праздника.

Вход. Прокимен дне. И чтения три.

Соборнаго послания Иоаннова чтение (главы 3, 4):

**В**озлюбленнии, аще сердце наше не зазрит нам, дерзновение имамы к Богу. И Егоже аще просим, приемлем от Него, яко заповеди Его соблюдаем и угодная пред Ним творим. И сия есть заповедь Его: да веруем во Имя Сына Его Иисуса Христа и любим друг друга, якоже дал есть заповедь нам. И соблюдаяй заповеди Его, в Нем пребывает, и Той в нем, и о сем разумеем, яко пребывает в нас, от Духа, Егоже дал есть нам. Возлюбленнии, не всякому духу веруйте, но искушайте духи, аще от Бога суть, яко мнози лжепророцы изыдоша в мир. О сем познавайте Духа Божия и духа лстча: всяк дух, иже исповедует Иисуса Христа, во плоти пришедша, от Бога есть. И всяк дух, иже не исповедует Иисуса Христа, во плоти пришедша, от Бога несть, и сей есть антихристов, егоже слышасте, яко грядет, и ныне в мире есть уже. Вы от Бога есте, чадца, и победисте тех, яко болии есть, иже в вас, нежели иже в мире. Они от мира суть, сего ради от мира глаголют, и мир тех послушает. Мы от Бога есмы: иже знает Бога, послушает нас, и иже несть от Бога, не послушает нас.

Соборнаго послания Иоаннова чтение (глава 4):

**В**озлюбленнии, аще сиче возлюбил есть нас Бог, и мы должны есмы друг друга любити. Бога никтоже нигдеже виде. Аще друг друга любим, Бог в нас пребывает, и

любвы Его совершенна есть в нас. О сем разумеет, яко в Нем пребываем и Той в нас, яко от Духа Своего дал есть нам. И мы видехом и свидетельствуем, яко Отец посла Сына Спасителя миру. Иже аще исповесть, яко Иисус есть Сын Божий, Бог в нем пребывает, и той в Бозе. И мы познахом и веровахом любовь, юже имать Бог в нас Бог любви есть, и пребываяй в любви в Бозе пребывает, и Бог в нем пребывает.

### Соборнаго послания Иоаннова чтение (главы 4, 5):

**В**озлюбленнии, аще кто речет, яко люблю Бога, а брата своего ненавидит, ложь есть: ибо не любяй брата своего, егоже виде, Бога, Егоже не виде, како может любить? И сию заповедь имама от Него, да любяй Бога любит и брата своего. Всяк, веруяй, яко Иисус есть Христос, от Бога рожден есть, и всяк, любяй Рождшаго, любит и Рожденного от Него. О сем вема, яко любим чада Божия, егда Бога любим и заповеди Его соблюдаем. Сия бо есть любви Божия, да заповеди Его соблюдаем, и заповеди Его тяжки не суть. Яко всяк, рожденный от Бога, побеждает мир, и сия есть победа, побеждающая мир, вера наша. Кто есть побеждай мир, токмо веруяй, яко Иисус, есть Сын Божий?

### На стиховне стихиры глас 1.

#### Подобен: Всехвальнии мученицы:

**С**имоне всеприснопамятне, \* сладости поток испил еси \* и богомудренно напоил Божию разума тепле желающия, \* Христа подражая. \* К Немуже ныне радостно прешел еси, \* славою обожаемь Троицы пресветлою \* и миром неисчетносильным.

**Стих:** Во всю землю изыде вещание их \* и в концы вселенныя глаголы их.

**С**имоне пречудне, \* Божию созерцая красоту \* и яко достижно зряй, \* единением лучшим наслаждаяся сего, \* и положеньми обожаемь, \* единаго, желаемаго и блаженнаго, \* радуяся, достигл еси, \* христороповедниче всеприснопамятне, \* Ангелом ныне соводворяемь.

**Стих:** Небеса поведают славу Божию, \* творение же руку Его возвещает твердь.

**С**имоне всеблаженне, \* Богу и человеком показался еси верен ходатай \* и ныне милостива \* благодерзновенными молитвами \* сотвори нам Христа, \* не престай Господа моля всегда \* даровати душам нашим мир и велию милость.

#### Слава, глас 6:

Тварь, яко орел высокопарный, прешел еси, \* Симоне священнейший, учениче Спасов и апостоле, \* и, леств идольскую огневещанными твоими догматы, \* яко вещь, всю поपालив, \* языки из глубины неведения к Божию познанию привел еси. \* И ныне молися Христу, \* яко да милостив будет нам в День судный.

#### И ныне, праздника.

#### Тропарь, глас 3:

**А**постоле святыи Симоне, \* моли милостиваго Бога, \* да прегрешений оставление \* подаст душам нашим.

#### Слава, и ныне, праздника.

## НА УТРЕНИ

На Бог Господь: тропарь праздника, дважды.

Слава, Тропарь, глас 3:

Апостоле святыи Симоне, \* моли милостиваго Бога, \* да прегрешений оставление \* подаст душам нашим.

И ныне, праздника.

По 1-й кафизме седален, глас 2:

Уловив языки, апостол славный \* научи концы земныя Тебе кланяться со Отцем и Духом, Христе Боже. \* Того ради утверди Церковь Твою и верным низпосли благословение Твое, \* едине Милостиве и Человеколюбче.

Слава, и ныне, праздника.

По 2-й кафизме седален, глас 4:

Лучу, яко солнце правды, испусти тя Христос, \* просветити всю землю, апостоле славный Симоне. \* Божественными твоими молитвами озаряеши \* и Божественным светом невечерним всех просвещаеши, \* верою совершающих святую память твою.

Слава, и ныне, праздника.

По полиелеи седален, глас 8.

Подобен: Премудрости:

Мрежею словес Божественных рыбы уловив словесныя, \* сия принесл еси начаток Богу нашему \* и, в Христовы язвы желая облещися, \* подобник страсти Его явился еси. \* Тем, сошедшеся по долгу чтим, апостоле славне, \* всепразднственную память твою и согласно вопием ти: \* моли Христа Бога грехов оставление даровати \* чтущим любовию святую память твою.

Слава, и ныне, праздника.

Степенна, 1-й антифон 4-го гласа.

Прокимен, глас 4: Во всю землю изыде вещание их \* и в концы вселенныя глаголы их.

Стих: Небеса поведают славу Божию, творение же руку Его возвещает твердь.

Всякое дыхание:

Евангелие от Иоанна, зачало 67.

Во время оно, явися Иисус учеником Своим, востав от мертвых. И глагола Симону Петру: Симоне Ионин, любиши ли Мя паче сих? Глагола Ему: ей, Господи, Ты веси, яко люблю Тя. Глагола ему: паси агнцы Моя. Глагола ему паки второе: Симоне Ионин, любиши ли Мя? Глагола ему: ей, Господи, Ты веси, яко люблю Тя. Глагола ему: паси овцы Моя. Глагола ему третье: Симоне Ионин, любиши ли Мя? Оскорбе же Петр, яко рече ему третье, любиши ли Мя; и глагола Ему: Господи, Ты вся веси, Ты веси, яко люблю Тя. Глагола ему Иисус: паси овцы Моя. Аминь, аминь, глаголю тебе, егда бе юн, поясаешся сам, и хождаше, аможе хотяше, егда же состареешися и воздежеш руце твои, и ин тя пояшет, и ведет, аможе не хочеш. Сие же рече, назнаменуя, коею смертию прославит Бога. И сия рек, глагола ему: иди по Мне. Обращься же Петр, виде ученика, егоже любляше Иисус, во след идуща,

иже и возлеже на вечери на перси Его, и рече: Господи, кто есть предай Тя? Сего видев Петр, глагола Иисусови: Господи, сей же что? Глагола ему Иисус: аще хощу, да той пребывает, дондеже прииду, что к тебе? Ты по Мне гряди. Изыде же слово се в братию, яко ученик той не умрет, и не рече ему Иисус, яко не умрет, но аще хощу тому пребывать, дондеже прииду, что к тебе? Сей есть ученик свидетельствующий о сих, иже и написа сия, и вем, яко истинно есть свидетельство его. Суть же и ина многа, яже сотвори Иисус, яже аще по единому писана бывают, ни самому мною всему миру вместити пишемых книг. Аминь.

**По 50-м псалме стихира, глас 6:**

**И**же Божественнаго Духа ясно благодать прием, \* священнаго лика апостольскаго сопричастник быв, Симоне, \* тем носимое с Небесе иногда дыхание огненное \* огненным языком вдохнув \* и языческое терновное попалил еси безбожие. \* Христа Бога, проповедниче, моли \* спастися душам нашим.

**Канон праздника со ирмосом на 6 и апостола на 8, егоже краестроичие: Апостола Симона пою славу. Глас 8.**

**Песнь 1**

**Ирмос: Песнь** возснем, людие, чудному Богу нашему, \* свободившему Израиля от работы, \* песнь победную поюще и вопиюще: \* поим Тебе, единому Владыце.

**В** Вышних Владыце предстоя, апостоле чудне, ты прославльшему и ученика Себе светло показавшему, просвети душу мою, да воспую Божественную твою память.

**В**сяко изобилие благих тебе Христос даровав, верх Божественных дарований, апостоле, показа тя, судом праведным, Богоявленне, праведный един.

**В**седуховную зарю приим, апостоле, сошедшую на тя с Небесе, огнедохновен был еси, всю попаляя прелесть многобожия.

**Богородичен: Ты**, мое мертвенное и тленное, безсмертное и нетленное, Спасе, показав, во утробу вселился еси Святыя Девы Пречистыя неискусобратно, вообразився же в человеческое естество.

**Катавасия праздника.**

**Песнь 3**

**Ирмос: Несть** свят, яко Господь, \* и несть праведен, яко Бог наш, \* Егоже поет вся тварь: \* несть праведен, паче Тебе, Господи.

**Б**ожественное таинство воплощения познал еси воистинну, апостоле Симоне Богоприятне, от Самаго Спаса зарю приим премирную.

**С**лово Безначальное и Присносущное Своего служителя ты, Симоне чудне, блистании светлыми богато просвети Божественныя благодати.

**Богородичен: С**вещник всезлатый Ты пророк прописа, Богородице, носящу Свет невечерний, просвещающего мир лучами Божества, Христа Бога нашего.

**Кондак и икос праздника. И седален апостола, глас 3.**

**Подобен: Божественныя веры:**

**Б**ожественнаго Духа светозарением тьму разрушил еси многобожия \* и верных сердца просветил еси, воспев спасительная повеления, \* и упразднил еси еллинския басни, Симоне славне, \* Христа Бога моли даровати нам велию милость.

**Слава, и ныне, праздника.**

#### Песнь 4

**Ирмос:** Из горы приосененная, Слове, пророк, \* единая Богородица, \* хотяща воплотиться боговидно усмотри \* и со страхом славословяще силу Твою.

Весь сокровище сый дарований Евангельских, благодати исполнен, свет мира и соль вселенная, Симоне всеблаженне, был еси.

Вещей студнаго явления отвратился еси, невестествен же Свет видети сподобился еси, Божества вид, приемшаго вещь человечества, досточудне.

Симоне, учениче жизни нетленной, умертви наш живущий грех животною силою Животодавца, еяже приял еси действие.

**Богородичен:** Равен быв Отцу Твоему по существу, равен человеком был еси по естеству, от Пречистой Девы нашу, Владыко, плоть приемый.

#### Песнь 5

**Ирмос:** От нощи неведения \* Боговедением просветивый концы, \* просвети мя утром человеколюбия Твоего, Господи.

Со огнем, Боговидче, ты зримый язык Духа приял еси усердно, на горнице седя.

Яко высок сый, в превышних селех живый, высокая и великая учения нам принесл еси.

**Богородичен:** Закон первый, Дево, рождением Твоим преста, процвете же благодать, и правда возсия.

#### Песнь 6

**Ирмос:** Ризу мне подаждь светлу, \* одеяйся светом, яко ризою, \* Многомилостиве Христе Боже наш.

Ревности тезоименит нареченный, Симоне досточудне, ревностию поревновал еси по Господе Бозе Вседержителю.

Тя Божественных чудес самоделателя Спас показа, дав власть тебе действием Своя благодати.

**Богородичен:** Да заградятся уста злочестивых, Богородицу Тя не мудрствующих, Всенепорочная, и лица в студ да облечутся.

#### Кондак, глас 2.

**Подобен:** Твердыя:

Известно премудрости учения в душах благочествующих положшаго \* во хвалении ублажим, яко Богоглаголиваго вси Симона: \* престолу бо славы ныне предстоит и со Безплотными веселится, \* моляся непрестанно о всех нас.

**Икос:** Апостола память вси, яко спасительный день, восхвалим ныне и благочестно ублажим: той бо всей вселенной, якоже солнце, сияет, света лучами всю мглу отгоняя, и просвещает любовию сего память совершающия и любезно почитающия. Темже усердно стецемся, воспевающе его: той бо Христу предстоит, моляся непрестанно о всех нас.

#### Песнь 7

**Ирмос:** Отроцы еврейстии в печи \* попраша пламень дерзновенно \* и на росу огонь преложиша, вопиюще: \* благословен еси, Господи Боже, во веки.

**С**транну ревность, Симоне, имея, тезоименит ревности, блаженне, нареклся еси и нрав, званию согласен, стяжал еси, благословен еси, Господи, – вопия, – во веки.

**В**купе Слову сликовствуя и собеседник Тому быв, Царствия тамо сопричастился еси, зовый: благословен еси, Господи Боже, во веки.

**Богородичен:** Аестию древле благожребия праотцы изгна змий, Ты же сих, Мати Божия, воззвала еси. Благословен, Пречистая, Плод Твоего чрева.

### Песнь 8

**Ирмос:** Мусикийским органом согласующим \* и людям безчисленным, покланяющимся образу в Деире, \* три отроцы не повинувшися, \* Господа воспеваху \* и славословяху во вся веки.

**Я**ко красны, Симоне, твои ноги, благолепен есть и язык, глаголющ славу Христову, и научи звати: Господа пойте и превозносите во вся веки.

**Д**обротами украшен светолучными и чудес пушкая сияния, познался еси, Симоне, людям семя благословенное: Господа пойте, дела, и превозносите во вся веки.

**Богородичен:** Ум не может рождества Твоего, Богородительнице, сказать и изрещи слово изнемогает: Бога бо, заченши, родила еси, Дево, Егоже превозносим во вся веки.

### Песнь 9

**Ирмос:** Чистую славно почтим, \* людие, Богородицу, \* Огнь Божества приемшую во чреве неопально, \* песньми величаем.

**Я**влен был еси концем, светом сияя, и, огонь духовный прием, световиден показался еси, темже тя величаем.

**В**есь Богу возложен, Тому срастворился еси, Егоже ныне моли, Богоявленне, о нас, верою и любовию восхваляющих тя.

**Богородичен:** Спасения всех Ходатаицу, явльшуюся человеком и мир просвещшую сиянии боговидная чистоты, в песнях величаем.

### Светилен.

**Подобен:** Духом во святилищи:

**Т**ечение красных твоих ног, Симоне апостоле, возвратив, \* к шествию небесному возшел еси, радуясь, \* и, Троице представ, во Отце видиши Сына и Духа Божественнаго. \* Сего ради верою пресвященную твою и Божественную празднуем память.

**Слава, и ныне, праздника.**

**На хвалитех стихиры на 4, глас 8.**

**Подобен:** Что вы наречем:

**Ч**то ты именуем, апостоле? \* Небо ли? яко славу исповедал еси Божию. \* Реку ли? яко тварь напаяеши тайно. \* Звезду, озаряющую Церковь, \* чашу, пиво святое изливающую, \* друга Христова ближнейшаго, \* безплотных равносельника. \* Моли о спасении душ наших.

**С**имоне, апостолов похвало, \* украсишася твои ноги, \* путем проповеди шествующия добре \* и пути вся вражия стесняющия \* широтою Божественнаго разума, \* Слова, явльшагося дебельством плоти \* и ученика тя преславна избравшаго, блаженне. \* Егоже моли спастися душам нашим.

Симоне, Богогласный апостоле, \* послан был еси, \* яко стрела от Христа световидна, \* уязвляюща враги, \* уязвленным же душам явственно подающа исцеление. \* Темже ты по долгу ублажаем \* и святое твое днесь совершаем торжество. \* Моли спастися душам нашим.

Слава, глас 2:

Оставив земная, последовал еси Христу \* и, знаменався дохновением Святаго Духа, \* послан быв от Него в языки погибшия \* обрати человеки во свет Богоразумия, \* апостоле Симоне, \* и, скончав подвиги Божественныя твоя страсти \* и мук различных, \* душу твою Христу предал еси, \* Того моли, всеблаженне, \* даровати нам велию милость.

И ныне, праздника.

Славословие великое. Ектении и отпуст.

## НА ЛИТУРГИИ

Блаженны праздника, песнь рядовая, и апостола, песнь 6-я, на 4.

**Ревности** тезоименит нареченный, Симоне досточудне, ревностию поревновал еси по Господе Бозе Вседержителю. [Дважды.]

**Слава:** Тя Божественных чудес самоделателя Спас показа, дав власть тебе действием Своея благодати.

**И ныне:** Богородичен: Да заградятся уста злочестивых, Богородицу Тя не мударствующую, Всенепорочная, и лица в студ да облечутся.

### Тропарь апостола, глас 3:

**Апостоле** святой Симоне, \* моли милостиваго Бога, \* да прегрешений оставление \* подаст душам нашим.

### Кондак апостола, глас 2.

**Известно** премудрости учения в душах благочестующих положшаго \* во хвалении ублажим, яко Богоглаголиваго вси Симона: \* престолу бо славы ныне предстоит и со Безплотными веселится, \* моляся непрестанно о всех нас.

**Прокимен, глас 8:** Во всю землю изыде вещание их, \* и в концы вселенныя глаголы их.

**Стих:** Небеса поведают славу Божию, \* творение же руку Его возвещает твердь.

### Апостол к Коринфяном, зачало 131.

**Братие,** Бог ны посланники последния яви, яко насмертники, зане позор быхом миру и Ангелом и человеком. Мы убо буи Христа ради, вы же мудри о Христе, мы немощни, вы же крепцы, вы славни, мы же безчестни. До нынешняго часа и алчем, и жаждем, и наготуем, и страждем, и скитаемся, и труждаемся, делаяюще своими руками. Укоряеми, благословляем, гоними, терпим, хулими, утешаемся, якоже отреби миру быхом, всем поправление доселе. Не срамляя вас сия пишу, но якоже чада моя возлюбленная наказую. Аще бо и многи пестуны имате о Христе, но не многи отцы, о Христе бо Иисусе благовествованием аз вы родих. Молю же вас: подобни мне бывайте, якоже аз Христу.

**Аллилуя, глас 1:** Исповедят Небеса чудеса Твоя, Господи.

### Евангелие от Матфея, зачало 56.

**Во** время оно, прииде Иисус во отечествие Свое, и учаше народы на сонмищи их, яко дивитися им и глаголати: откуда Сему премудрость сия и силы? Не Сей ли есть тектонов сын? Не Мати ли Его нарицается Мариам, и братия Его Иаков и Иосий, и Симон и Иуда? И сестры Его не вся ли в нас суть? Откуда убо Сему сия вся? И блажняхуся о Нем. Иисус же рече им: несть пророк без чести, токмо во отечествии своем и в дому своем. И не сотвори ту сил многих за неверство их

**Причастен:** Во всю землю изыде вещание их, \* и в концы вселенныя глаголы их.



## МОЛИТВА

**С**вятой славный и всехвальный апостоле Христов Симоне, сподобивыйся прияти в дом твой в Кане Галилейстей Господа нашего Иисуса Христа и Его Пречистую Матерь, Владычицу нашу Богородицу, и очевидцем быти преславнаго чудесе Христова, на браце твоём явленнаго, претворения воды в вино! Молим тя с верою и любовию: умоли Христа Господа претворити души наша из грехолюбивых в боголюбивыя; сохрани и соблюди нас молитвами твоими от искушений диавольских и падений греховных и испроси нам свыше помощь во время уныния и беспомощия нашего, да не преткнемся о камень соблазна, но неуклонно шествуем спасительным путем заповедей Христовых, дондеже достигнем оных блаженных обителей райских, идеже ты ныне водворяешься и веселишься. Ей, апостоле Спасов! не посрами нас, крепче на тя уповающих, но буди нам помощник и покровитель во всем житии нашем и помози нам благочестно и богоугодно житие сие временное скончати, благую и мирную христианскую кончину получитьи и добраго ответа сподобитися на страшнем суде Христове, да, избежавше мытарств воздушных и власти лютаго миродержца, унаследуем Царство Небесное и прославим великолепое Имя Отца, и Сына, и Святаго Духа во веки веков. Аминь.

## СВЯТОЙ АПОСТОЛ СИМОН ЗИЛОТ

**С**вятой апостол Симон Зилот происходил из Каны Галилейской, был сыном святого Иосифа Обручника, по плоти братом Господа, и одним из 12-ти апостолов. Первое чудо, которое сотворил Спаситель, – претворение воды в вино, произошло в доме Симона: во время брачного пира для гостей не достало вина. Тогда Господь, по предстательству Пресвятой Богоматери, претворил воду в вино (Ин. 2:1–11). Пораженный чудом, Симон всем сердцем и душой уверовал в Господа Иисуса как обетованного Мессию и, все оставив, последовал за Ним. Симон получил наименование «зилота», т. е. ревнителя. В день Пятидесятницы он принял вместе с другими апостолами дар Святого Духа.

**С**вятой апостол Симон проповедовал учение Христово в Иудее, Египте, Ливии, Киринее и Британии. В Абхазии принял мученическую кончину. Впоследствии в XIX веке на месте подвигов апостола, близ Иверской горы, был сооружен Новоафонский монастырь Симона Кананита.